



PROME FASE REVITALISACION ORANJESTAD NO A KEDA CLA MANERA PALABRA

2

MINISTER URSELL ARENDS TA ANUNCIA EXPANSION DI AREANAN RAMSAR

AREANAN PROTEGI NA BIENESTAR
DI ARUBA SU NATURALES

TE MEMEY DI 2024 CORTE DI CASACION LO TIN DECISION RIBA APELACION RELACIONA CU MATRIMONIO DI MESUN SEXO

PARLAMENTARIO INDEPENDIENTE MR. GERLIEN CROES: MINISTER TJON TIN PA RINDI CUENTA DI SU MANEHO PA CU DERECHO HUMANO



NESCAFÉ ROAD SHOW

Bin disfruta di e Nescafé Classic nobo:
BOLD Colombian Blend.

Pasa na bo supermercado favorito
y purba Nescafé Bold **GRATIS!**

Recharged and Ready

with NESCAFÉ Classic Bold Colombian Blend.

Diasabra dia 11 di November
Mundo Nobo Supermarket
9AM - 12 PM

Diadomingo dia 12 di November
Cheng's Supermarket
9AM - 12 PM

Sigui nos riba social media pa mas informacion.



[ig](#) [f](#) [martijntradingaruba](#)



Tired of Manually Processing Forms?

SCANSYS • Digital Processing of Purchase Invoices and more
vision on imaging • Seamless Integration with most Financial Software
Complete Control of Authorizations via Workflows

This OCR software scans every field on any kind of document and automatically fills the data in your preferred financial/ERP software!

VCC
International NV

TEL. 583-7072 | [info@vcc-int.com](#) | [www.vcc-int.com](#)

Prome fase revitalisacion Oranjestad no a keda cla manera palabra

Ayera DOW a emiti un comunicado di prensa informando cu e prome fase di e proyecto di revitalisacion di centro di Oranjestad, esta e sector di Columbusstraat y parcialmente Wilhelminastraat, a bolbe confronta contratiempo y esaki lo dura un siman mas pa e keda cla.

Segun e informe suministra, e retraso a sinta den e hecho cu e compania cu mester a entrega 'klinkers' pa caba e proyecto, no tabatin suficiente disponibel y esaki a pone cu no por a caba cu e trabou pero ayera mes e compania cu cuminsa entrega e klinkernan cu falta pa asina e trabou por sigui y pa proximo fin di siman, esaki keda finalisa.

Aki tin cu señala cu Minister Geoffrey Wever na momento di anuncia e plan di gobierno pa revitalisa centro di Oranjestad, el a declara cu e proyecto aki lo ser ehecuta den tres fase y e proyecto di Columbusstraat a inicia fin di Februari comienso di Maart.

Na inicio di e prome fase aki, Minister a anuncia lo siguiente: "Cu e prome fase aki, gobierno kier motiva y manda un señal concreto na sector priva cu gobierno di Aruba ta comprometi cu revitalisa nos centro di ciudad."

Sinembargo e proyecto a bira un problema grandi pa e sector den cual esaki a ser realisa creando inconveniencia no solamente pa loke ta fluho di trafico den centro pero tambe pa varios negoshi den cercania.

E prome fase aki a tuma 9 luna pa ehecuta si esaki keda cla e proximo siman, loke tin cierto duda ariba y Sali for di e punto di bista cu e otro dos fase nan tambe lo por tin e duracion aki, aña di eleccion lo yega na 2025 caminda ainda revitalisacion di Oranjestad lo no



ta cla.

Pa colmo dia 3 di November ultimo, Minister Wever a anuncia cu otro aña lo ta turno pa revitalisacion di San Nicolas lo inicia pa cual tin hopi duda ainda.

E proyecto di Columbusstraat a inicia y dia 9 di Mei a constata cu a surgi un problema serio na momento c'un tubo di concret a keda destrui y mester a adapta e plan di trabou loke a crea un stagnacion inmenso.

E splicacion duna pa e retraso di un

siman aki ayera pa DOW ta lanta e pregunta ta cual experto of arkitekto a haci e eror di calculacion aki, ya cu ta for di momento cu a haci e pedida pa entrega di klinkers, esun responsabel mester a haci un calculacion adecuado y corecto.

Te ainda Minister Wever y gobierno no a anuncia inicio di e di dos fase di e plan di revitalisacion di centro di Oranjestad, cu ta birando algo di suma urgencia.

Minister Ursell Arends ta anuncia expansion di areanan Ramsar

Areanan protegi na bienestar di Aruba su naturalesa

Diabierna merdia durante e simposio titula “Nature-Based Solutions (NBS)”, Minister Arends a duna un discurso den e aula di Universidad di Aruba. E simposio a wordo organisa door di Fundacion Parke Nacional Aruba y Dutch Caribbean Nature Alliance. E enfoka di e evento ta pa expande conocimiento y accionnan riba solucionnan cu ta encera procesonan natural pa aborda desafionan ambiental entre e paisnan den Caribe Hulandes.

E simposio a conta cu participantenan renombra manera Su Altesa Real Prinses Beatrix, Su Excelencia Gobernador Boekhoudt y Su Excelencia Prome Minister Wever-Croes, hunto cu diferente invitado distingui.

Den Minister Arends su discurso e la expresa su gratitud pa e organisadonan, enfatisando e importancia di colaboracion pa avansa e rol di naturalesa den nos comunidad. E la urgi e audiencia pa reconoce y aprecia e esfuersonan colectivo di esnan presente y tur cu tin naturalesa na pecho.

E discurso a pone enfasis ariba e urgencia di iniciativanan pa preservacion di naturalesa y alabes e compromiso di Aruba pa conserva naturalesa mediante leyman y maneho.

Un anuncio cu sigur a gara atencion di tur presente tabata e expansion di areanan protegi bou di e convenio di Ramsar na Aruba. Esaki fuera di Spaans Lagoen, awo ta inclui e sistema di Western Wetlands, cual ta consisti di cinco salina, Zuidkust, Westpunt y Oostpunt.

Ramsar ta un reconocimiento internacional pa e valor natural di areanan tanto riba tera como marino. Den futuro un “Island Round Marine Park” tambe lo ta parti di maneho di nos areanan marino.

Contrario na Ramsar, e designacion di un parke marino rond di Aruba ta un manera di reconoce, den legislacion nacional e necesidad pa uza e areanan aki den un manera sostenibel. Aunke e reconocimiento di Ramsar no ta prescribi regulacionnan specifico, e ta stimula Aruba pa intensifica su esfuersonan di conservacion.

Pa duna como ehempel, Spaans Lagoen a ricibi reconocimiento di Ramsar den e decada di aña 80, pero designa formalmente como area protegi den ley a sosode na 2017.

Minister Arends ta remarca cu e status di Ramsar tin como meta pa proteha e arenan aki sin interveni cu actividadnan economico, enfatisando reduccion di daño y restauracion di naturalesa den caso di daño cu ta inevitabel.



Tambe a remarca e importancia di cooperacion entre fronteranan den Caribe Hulandes pa conservacion marino. Minister Arends su ambicion ta pa nos yega na un “ABC-wide” Hope Spot na 2024, colaborando cu Mission Blue pa proteha e lama comparti entre Aruba, Boneiro, y Corsou.

E palabranan di Sylvia Earle, presidente di Mission Blue: “No water, no life; No blue, no green” a wordo menciona cual ta enfatisa e rol fundamental di awa pa mantene bida riba tera.

Palabra di gradicimento a bay na organisacionnan di FPNA, DNM, TurtugAruba, Aruba Birdlife Conservation, Aruba Marine Mammal Foundation y Wageningen Universiteit pa nan esfuersonan colaborativo den e gran logro di e status di Ramsar pa e regionnan adicional na Aruba.

“Laga nos tur continua di tin pasenshi pa representa, preserva, conserva y persisti den nos mision na bienestar di naturalesa. Desaroya nos mes hunto cu naturalesa sin lubida pa disfruta tur locual naturalesa ta ofrece. Naturalesa ta nutri nos, ta ora pa nos tambe nutri naturalesa”, Minister Arends a expresa.

Te memey di 2024 Corte di Casacion

Lo tin decision riba apelacion relaciona cu matrimonio di mesun sexo

No ta usual cu Corte di Casacion tin un sesion manera esun cu a tuma luga ayera mainta na Den Haag, caminda tanto gobierno di Aruba, esun di Corsou y Sint Maarten, a apela e decision tuma pa Corte Superior den a dicidi cu e paisnan aki tin cu permiti matrimonio di personanan di mesun sexo. Loke tabata in-usual tabata e forma con a permiti varios abogado como algun ciudadano, trece argumentonan dilanti cu realmente no ta asuntonan riba cual Corte di Casacion normalmente ta dicidi.



Ora cu busca nificacion di e palabra “cassatie” lo siguiente ta ser muestra como nificacion: “(juridisch) vernietiging van een vonnis (door de Hoge Raad) wegens verkeerde toepassing of schending van de wet.”

Pues tur loke Corte di Casacion normalmente lo a haci, ta di scucha argumentonan di e partidonan envolvi, relaciona cu e proceso legal y e decision cu Corte Superior a tuma den e caso di legalisacion di matrimonio di hendenan di mesun sexo. A resalta ayera sin duda, algun argumento treci dilanti caminda entre otro e representante legal di gobierno di Corsou, esta Chester Peterson, a cataloga e decision di Corte Superior na Willemstad, pa legalisa matrimonio entre personanan di mesun sexo, colmo un decision ‘colonial’

Fuera di e expresion aki cu a cay formalmente for di sla, tambe abogado Peterson a alega cu matrimonio entre hendenan di mesun sexo, ta algo cu ta bin di e mundo occidental liberal cu no ta cuadra den un pueblo di Corsou caminda pa gran parti e ciudadanonan aki ta Catolico.

El a muestra tambe cu e situacion aki no ta solamente na Corsou ya cu tin otro islanan caminda homosexualidad ta castigabel pa ley y abogado Peterson a bay asina leu na muestra cu si bay over na permiti matrimonio di hendenan di mesun sexo, esaki lo habri porta tambe pa pedofiel, sexo den trio y otro tiponan di desaroyo sexual.

Pa e motibonan aki sr Peterson a considera e decision di Corte Superior como uno irresponsabel y eror formal. Pa loke ta gobierno di Aruba, tabata abogado Jan Paul Heering kende e presenta obhecionnan huridico contra di e decision di Corte Superior riba e materia di matrimonio di mesun sexo caminda nan ta considera cu e tres Huesnan cu a atende e caso aki, den forma incorrecto a sinta riba stoel di legislado of sea di Parlamento di e dos paisnan.

Pues di parti di Aruba por considera cu e abogadonan a tene nan mes na hiba argumento contra di e aspecto huridico insistiendo cu e tres Huesnan a tuma un decision violando Constitucion di pais Aruba.

Otro representantenan legal cu a hiba palabra durante di e sesion di ayera mainta den nomber di Human Rights Caribbean Foundation y Fundacion Orguyo Aruba, tabata abogado David Wever y abogado Ton Vermeulen y ambos a argumenta cu tanto gobierno di Aruba como gobierno di Corsou ta hibando un tipo di discriminacion sistematico caminda parehanan di mesun sexo, ta ser trata manera ciudadanonan di segunda categoria.

Kisas e sorpresa di mas grandi tabata momento cu a permiti un pareha di mesun sexo for di Corsou dirigi nan mes na e Huesnan cu no ta algo usual den e tipo di casonan aki.

Na final Corte di Casacion a dicidi cu lo permiti e partidonan envolvi pa reacciona por escrito riba argumentonan cu a bin dilanti y pa dia 19 di Januari di 2024, Abogado General Snijders lo publica conclusionnan y despues Corte di Casacion lo tuma un decision dentro algun luna, pues esaki por nifica cu ta te memey di otro aña, e decision lo cay den a apelacion aki.

LOTTO 5

AWEMainta

Afl.

1.900.000,-

Selecta:

Selecciona cinco (5) number
entre 1 y 35

03 12 15 24 33

Multi Draw:

Selecta bo numbertan pa e
sorteo desea y siguiente sorteonan.
Pa asina bo keda den wega!

03 12 15 24 33 **x2** 03 12 15 24 33 **x3**

03 12 15 24 33 **x4** 03 12 15 24 33 **x5**

Combo: Puntra bo rebendado pa opcionan di combo.



Afl 4



Mirrors Beauty Academy ta ofrece e siguiente serviccionan

Laba
Corta
Blowdry
Keratina
Cold Wax

Tinja
Highlights / Mechitas
Ombre / Californiana
Bayalage
Peinado

Makeup
Threading
Barberia
Manicure
Pedicure

Y
mucho
mas!

Tel. Alejandro: 564-4412 of 582-0110 • Whatsapp: 732-0110 of 566-0110 • Adres: Ponton 76 - Suite #3

Parlamentario independiente mr. Gerlien Croes:

Minister Tjon tin pa rindi cuenta di su maneho pa cu derecho humano

E desaroyonan reciente den tereno di husticia, especificamente pa loke ta sosode paden di nos wardanan di polis y e trato cu ta duna na detenido tin atencion di comunidad y su representantenan.

P'esey e siman aki Croes, sosteni pa colega Parlamentario Miguel Mansur di Accion 21 y mr. drs. Rycond Santos do Nascimento, kende tambe ta independiente, a manda un peticion na presidente di parlamento pa yama un reunion publico den cual ta yama Minister di Husticia y Asuntonan Social, Rocco Tjon pa bin duna cuenta riba varios punto di preocupacion.

Croes ta indica cu por bay bek na por lo menos un aña y mey den cual a presenta varios incidente lamentabel cu persona mientras cu nan tabata bou detencion, incluyendo casonan di suicidio. Pa e parlamentario simplemente no ta un opcion pa keda keto y man crusa. "Violacion di derechonan humano cu ta derechonan fundamental di cada ciudadano por tin consecuencia riba nivel internacional pa e reputacion di nos pais como un nacion desaroya" Parlamentario Croes ta declara.

Sea ta den aspecto di procedura y protocol ora cu ta anda cu detenido, of den medida pa salvaguardia nan integridad fisico y salud (mental) loke ta sosodiendo ta trece preguntanan, cumpliendo cu su responsabilidad, representantenan di pueblo ta eherce nan derecho como miembro di parlamento pa yama un reunion publico y yama e minister pa bin splica Parlamento y pueblo cua ta e situacion actual.

Croes: "Nos tin, como pais, un responsabilidad pa raporta tambe na Nacionnan Uni con nos ta garantisa e derechonan fundamental di cada persona, di cada ciudadano"; E minister, di su banda, tin un responsabilidad pa tur detenido paso e cuida ta cay bou di dje." Si e detenido ta un hoben, protec-



cion y derecho di mucha tambe ta hunga un papel.

Y mientras cu esaki no ta un situacion exclusivo di Aruba den Reino, pasobra varios investigacionnan y rapport nan a wordo traha na Hulanda, incluso door di Ombudsman di Hulanda ariba e temanan aki, ta sumamente importante pa na e momento aki sr. Tjon splica kico ta e maneho y procedura ora di haci investigacion independiente entre otro ora di casonan di morto durante detencion.

Ta bon pa corda cu sea inocente of culpabel, tur persona ta proteha pa declaracion universal di derecho humano, incluyendo sospecho, detenido of preso. Mas aleu, ora cu algo ta sosode cu un detenido, tin famia of amistad cu ta keda atras y cu merece e consideracion y respet di haya sa exactamente kico a pasa cu nan ser keri, asina Parlamentario Croes a finalisa, sperando cu presidente di parlamento lo sa di yama e reunion publico aki pronto.

Parlamentario independiente mr. dr. Rycond Santos do Nascimento:

Otmar ta mina confiansa den nos sistema hudicial



Dia 20 di maart 2023 Otmar Oduber a tene un rueda di prensa encuanto caso Flamingo den cual e ta un sospechoso. El a subraya su inocencia. El a elabora cu no tin ningun prueba contra dje. Segun Otmar ta pa scapa cara di Ministerio Publico cu a core gara e storia di spirito di Marisol Tromp. El a ataca e credibilidad di Ministerio Publico door di pone su flechanan riba Marisol. Segun Otmar Marisol a entrega 'denuncia falso' contra Chris Dammers, Marisol no tabata ministeriabel pa motibo di un debe miyonario cu belasting, AVP y MEP a core cu Marisol y hasta partido POR a core cu Marisol pa motibo di su falta di integridad.

Un par di dia despues, riba dia 24 di maart, hues a condena lider di POR, Allan Howel, pa falta di integridad. E sentencia ta muestra entre otro cu Allan a bay puntra Sinterklaas con lief e tesorera di e fundacion di fractie di POR tabata. Aparentemente Sinterklaas a bisa Allan cu e tesorera tabata lief y cu e tabata merece un bonus di Afl. 1000,- mientras cu Allan mes tabata merece un bonus di Afl. 10.000,-. Pa e tipo di echonan aki Allan a haya 24 luna di prizon pa estafa di casi Afl. 200.000,- di Pais Aruba. Ministerio Publico a reacciona riba e sentencia cu e promesa cu lo sigui actua contra corrupcion.

Sospechosonan y nan sostenedornan tin e tendencia di ataca Ministerio Publico. Nos a mira esey den caso Ibis, caso Avestruz y den caso Flamingo. Pero un politico mester tin Aruba na pecho y pensa riba e consecuencianan di su atakenan. E atakenan ta fomenta desconfiansa bao di hubentud contra nos sistema hudicial. Ciudadanonan cu ta perde

confiansa no kier colabora cu polis y husticia. Asina e politiconan aki ta pone seguridad di henter nos comunidad den peligro.

Pio ainda ta ora cu politiconan ta cuminsa fomenta sinberguenseria den nos pais, siñando nos hobennan pa gaña y pa no worry cu ley. Nos tur ta conoci cu e mentira cu Paul Croes lo a bay prizon pa dos caha di cerbes y un wea di sopi. Pa colmo hopi hende ta kere e mentira. Mescos nos a mira den caso Avestruz. Hende ta plama e mentira cu Corte no por a prueba corrupcion di Benny Sevinger. E berdad ta cu hues a haya tanto Paul como Benny culpabel di soborno y malversacion.

Ta un lastima cu Otmar kier sigui e mal ehempelnan relata na casonan Ibis y Avestruz. Manera Zwarte Piet e kier core cu ruchi tras di henter e cadena hudicial y e mes aparentemente ta un santito cu ta merece alabansa. Djis scuch'e elabora riba e transaccion entre Ministerio Publico y Hans Geerman. Conscientemente Otmar ta insinua cu ta normal pa gaña den administracion di Pais Aruba cu un persona a ser nombra pa traha como "medewerker bedrijfsvoering", mientras su spirito so ta haci e trabao ey. Asina e ta despista pueblo.

ero e transaccion entre Ministerio Publico y Hans Geerman ta papia pa su mes: e storia di spirito ta berdad! Ta tempo pa Otmar bandona e talking point di Paul Croes y Benny Sevinger cu ta tur politico ta haci e. Ta keda na Otmar pa bandona e fila di politico cu ta divulga cu loke ta corrupto ta normal y "nada robes".

EXECUTORIALE OPENBARE VERKOOP

Op **donderdag 16 november 2023** des namiddags om 14.00 uur, zal in de vergaderzaal van de “Aruba Surfside Marina”, L.G. Smith Boulevard 7, Oranjestad, Aruba, ten overstaan van notaris mr M.J.C. Tromp of haar plaatsvervanger, de executoriale verkoop, als bedoeld in artikel 3:268 van het Burgerlijk Wetboek van Aruba, bij opbod en daarop volgende afmijning worden gehouden van:

- het recht van erfpacht tot 10 augustus 2031 op een perceel domeingrond, groot 400 m², gelegen te Kas Paloma in Aruba, kadastraal bekend als Land Aruba, **Eerste Afdeling Sectie T nummer 131**, met het daarop gebouwde, plaatselijk bekend als **“Kas di Paloma 24-A”**;
Inzetprijs: Afl. 243.000,==.
- het recht van erfpacht tot 15 april 2064 op een perceel domeingrond, groot 430 m², gelegen aan de Caya Mangasina te Mabon in Aruba, nader omschreven in de **kadastrale meetbrief nummer 187 van 20 mei 1998**, met het daarop gebouwde, plaatselijk bekend als **“Caya Mangasina 64”**;
Inzetprijs: Afl. 150.000,==.

De veilcondities zullen 8 dagen voor de verkoopdatum ter inzage liggen ten kantore van voornoemde notaris.

De executant behoudt zich het recht voor, de veiling uit te stellen en op te houden zonder de verplichting de reden(en) daartoe te noemen.

Bieders dienen terstond een bankgarantie of een gelijkwaardige document dat aanvaardbaar is voor de executant, te overleggen en in het bezit te zijn van een geldig identiteitsbewijs.

Notariskantoor mr M.J.C. Tromp
Santa Cruz 35

Tel: 5853500/5857900

Fax: 5854222

Email: veiling@notaristromp.com/auction@notaristromp.com

Auto Ford a bay cay den greppel na Madiki



Diahuebs den oranan di atardi tanto polis y ambulance a bay altura di Centro di Bario Playa Pabou, un a sosode un accidente di trafico y lo tawata tin hende herida.

Na yegada di polis; ambulance tambe a presenta y mesora a bay atende cu un di e chauffeurnan involvi. N'e sitio Paramediconan a bay atende cu ne y por a nota cu mas tanto e lo pasa den un susto basta bon.

Na e sitio un Ford SUV a bay cay den e greppel y parcialmente ariba caminda e otro vehiculo cu ta un pickup color cora a keda para.

LOCUAL A SOSODE

Ta parce cu e pickup color cora a bay lora pa drenta e caminda di tera net dilanti Centro di Bario; y pa un of otro motibo e Ford a bay pas'e na su man robes y ta cera brake lastra bay cay den e greppel na banda di caminda.

Paramediconan a atende na e sitio mes y sigur lo bay tin mester di Takelwagen pa saca e auto Ford.



Nintendo ta anuncia live-action film pa 'The Legend Of Zelda'



Foto Cortesia: Nintendo Life

Dia 8 di november, 2023, Nintendo a anuncia cu nan ta desaroyando un live-action film basa riba un di nan wega mas popular cual ta e serie di The Legend of Zelda. E film lo wordo produci door di Shigeru Miyamoto, kende ta e creador di Zelda anto tambe Avi Arad, ken a yega di produci films nan mane Spider-man y Venom. Wes Ball, kende tabata e director di The Maze Runner trilogy lo directa e pelicula aki.

Nintendo hunto cu Sony Pictures Entertainment lo co-financia e film, cual Nintendo mes lo ta financiando mas cu 50%. Sony lo zorg pa e costo di distribui e pelicula.

Te awo no tin mas otro detayes di e pelicula, mane kico e plot lo ta, ken lo hunga aden of e fecha cu e pelicula sali. Miyamoto a bisa si cu e lo ta hopi druk bezig den e produccion y cu e ta cometi pa traha un pelicula cu lo surpasa e expectativa di e fanatico di e serie. Fanaticonan cu mas sigur tin años ta warda pa un pelicula di Zelda yega riba e pantaya grandi. Mester bisa si cu ainda Nintendo ta basta nobo pa trece nan weganan riba un otro media. Esun ultimo di Mario a bay hopi bon, pero esun cu nan a traha den añanan 90, e pone Nintendo rindi riba e "movie business" di biaha.

Pero ya, a yega tempo pa purba atrobe, y tempo so por bisa con e pelicula di Zelda lo ta si e ta bon of no.



任天堂株式会社

Nov 7, 2023

@Nintendo · Follow

Replying to @Nintendo

This is Miyamoto. I have been working on the live-action film of The Legend of Zelda for many years now with Avi Arad-san, who has produced many mega hit films. [1]



任天堂株式会社

@Nintendo · Follow

I have asked Avi-san to produce this film with me, and we have now officially started the development of the film with Nintendo itself heavily involved in the production. It will take time until its completion, but I hope you look forward to seeing it. [2]



nintendo.co.jp

News Release : Nov. 8, 2023 "Development of a ...

Press release of Nintendo Co., Ltd.

6:03 PM · Nov 7, 2023


27.5K

Reply

Share

Read 380 replies

Rockstar a bisa cu por spera e trailer pa 'Grand Theft Auto 6' den december



Rockstar Games a anuncia cu e prome trailer di Grand Theft Auto nobo lo sali den e prome simannan di december 2023. Nan a anuncia esaki via un post riba Rockstar's official X (antes Twitter) account.

E post ta bisa:

"We are very excited to let you know that in early December, we will release the first trailer for the next Grand Theft Auto. We look forward to many more years of sharing these experiences with all of you."

Rockstar ta trahando riba e wega aki pa algun años caba, y fanatico di e wega ta loco pa haya sa cualkier informacion di e wega. Cu e anuncio aki, esaki solamente ta duna mas anticipacion. E trailer lo duna e muestra poco detayes di e wega su setting nobo, e personahe y tambe e gameplay. Tambe mas sigur lo muestra e wega su titulo oficial cual ta specula cu lo ta Gran Theft Auto VI.

E siguiente GTA mas sigur lo ta un di e weganan mas anticipa di semper anto cu e release di e trailer esaki lo ta un paso grandi pa Rockstar Games. Esaki lo ta un trailer unda hendenan lo wak frame pa frame pa no perde ningun detayes y informacion cu por duna mas hints di e wega.

Nintendo A Sugerí Cu Nan Lo Sigui Sostene E Switch Despues Cu Nan Saca Nan Next-Gen Console

Den un informacion financiero recién, Nintendo a sugerí cu nan lo sigui di duna sosten pa e Nintendo Switch te hasta despues cu nan saca nan siguiente console.

"Nintendo Switch will be entering its eighth year in March 2024," Nintendo a bisa. "We will continue to release new titles and content for Nintendo Switch without being bound by the traditional concept of the platform lifecycle."

Den e declaracion ta indica cu Nintendo ta cometi pa laga e Switch keda un plataforma util pa años mas largo. Esaki no ta sorprendente si, debi cu con exitoso e Switch ta pa nan. E Switch a bende mas cu 132 miyon unidad rond di mundo, y ainda e ta bende bon. Mayoria gamers cu tin un Xbox of Playstation tambe tin un Nintendo Switch. Dus Nintendo tin un base di usuario basta grandi y activo. Nintendo Switch tambe ta un hybrid console cu ta ofrece un gaming experience unico. Otro cos ta cu Nintendo varios di weganan grandi cu ta exclusivo pa e Switch, mane Mario, Zelda, y Pokemon. Esaki nan ta frankisia cu ta keda popular pa hende grandi y mucha. Tur manera esaki ta un bon noticia pa tur e usuari-onan di Nintendo Switch.

Enigma Economico

Mericano ta expresa su mal contento a pesar dje aumento di gasto den consumo

Den un desconcertante paradox economico, e Mericanonan ta gara entre realidad di un gasto di consumo robusto y un sentimiento predominante di mal contento cu e economia. Mientras cu e indicadonan positivo manera e caida di e indice di inflacion, prosperidad di e mercado laboral y e resistencia di gasto di e consumidornan, ta sugeri un panorama economico saludable, e sentimiento di e ciudadonan ta revela un contrast marca.

Segun un encuesta reciente, un significativo 72% di e Mericanonan ta kere cu cos den e pais ta bayendo malo y 68% ta considera cu e economia ta 'extremadamente importante' den nan decision di voto p'e proximo aña. A pesar di e mal contento generalisa aki, solamente 2% di e votadonan ta cualifica e economia di ta excelente, loke ta ilustra un reto potencial p'e partidarionan di Bidenomics.

E gasto di e consumidornan, motor principal di e economia Mericano, a impulsa e producto interior bruto (GDP) te na un notabel indice di crecemento anualisa di casi 5% den e ultimo trimestre, mas di e dobel cu e trimestre anterior. E gasto robusto aki, cu ta inclui gasto di entretenimento, restaurant y vacacion, ta contradeci e narrativa di un poblacion profundamente preocupa p'e estabilidad economico.

Sinembargo, e bonansa economico aki ta sconde un tension profundo. E Mericanonan ta recurriendo na recurso financiero precario, manera spaarmento pa deal cu nan gastonan, un movimiento tipicamente asocia na desesperacion of n'e confianza di un mercado laboral sigur. Mientras cu algun indi-



viduo por cay den e prome categoria, un parti substancial ta gastando liberalmente debi na nan confianza den e condicionnan economico actual.

E sentimentonan contradictorio ta extende e debe record di e credit cardnan, cu ta alcanza e asombroso cifra di 1,08 biyon dollar, cu un cantidad cada biaha mayor di persona cu ta retrasa den pago. E paradox financiero aki ta converti den un factor significativo den e panorama politico, influenciando potencialmente den e careda presidencial di 2024.

E presidente di e Reserva Federal, Jay Powell, ta atribui e mal contento na un fobia colectivo di e inflacion. Sinembargo, e impacto tangibel di e inflacion, cu ta manifesta den e aumento di e prijsnan, parece ta un preocupacion mas urgente p'e Mericanonan. E gastonan cotidiano, manera un cup di koffie mainta, ta sigui subi, loke ta

contribui n'e frustracion di e publico.

Memey di e conflictonan economico aki, e falta di vivienda ta bin como un factor fundamental cu ta influencia den e malestar nacional. Vivienda hopi biaha promociona como un manera pa bira rico, ta enfrenta na costo sin precedente desde 1984, impulsa p'e aumento di prijs y e tiponan halto hipotecario. Pa hopi, e soño pa ta propietario di un cas, cada biaha ta dificil pa alcanza, specialmente e hobennan cu ta biba pa dia.

E herida psicologico aki ta profundo y ta supera e alcance di e intervencionnan di e maneho monetario. E convergencia di e bonansa economico y e mal contento generalisa, ta subraya e complehidad di e panorama economico actual, cu no solamente ta influencia den e opinion publico, sino tambe den e trayectoria di e futuro debatenan y discusion politico.

Alemania ta aplica un maneho migratorio 'historico' mas estricto

Mientras cu Italia ta lanta polemica cu centro di asilo na Albania

Den un decision historico despues di e combersacionnan maratonico manteni na Berlin, e canciyer Aleman, Olaf Scholz, hunto cu e lidernan estatal, a acorda e medidanan mas estricto pa confronta e afluencia di migrante, considerando esaki como un “momento historico”. E medidan recien aproba kier facilita e procedimentonan di asilo, limita e prestacionnan social n’e migrantenan y asigna e fondonan federal adicional n’e comunidannan local.

E medida ta yega na un momento caminda cu Alemania ta enfrenta un creciente presion, tanto interno como di oposicion, pa frenta e creciente cantidad di yegada, predominantemente di Siria, Afganistan y Turkia.

E peticionnan di asilo a aumenta aproximadamente cu 73% entre januari y september di e aña aki superando 250 mil, cu ta dificulta e retonan politico encunto migracion.

Sinembargo e decision di recorta e prestacionnan social n’e migrantenan a lanta critica dentro di gobierno di coalicion en particular di parti di e berdenan. Algun miembro a argumenta cu e reduccion di e prestacionnan social por provoca un aumento di e tensionnan social y obstaculisa e integracion.

Mientrastanto, e presentacion door di Italia pa un acuerdo migratorio a añadi otro capa di controversia. Prome Minister, Georgia Meloni, a revela su plannan di construi centro di recepcion di asilo na Albania, p’e yegada via lama, presentando esaki como un posibel modelo di cooperacion entre UE y e paisnan tercero. Sinembargo e Comité Internacional di Rescate a condena e acuerdo di Italia cu Tirana, cualificando di “golpi nobo” n’e solidaridad di UE y haciendo enfoke den e derecho fundamental pa pidi asilo.

E organisacionnan humanitario entre nan Doctors without borders, a expresa nan preocupacion p’e posibel denegacion di acceso n’e territorio Italiano y e maneho extrateritorial di e peticionnan di asilo, cualificando esaki di desviacion di e obligacionnan estableci den materia di proteccion y rescate.

Mientras e acuerdo migratorio Italiano a lanta critica, e medidanan Aleman estricto ta pone di relieve e complejidad y e debatenan actual encunto e politica migratorio na Europa.

E decisionnan tuma pa ambos pais ta refleha e retonan mas general na loke e nacionnan di UE ta enfrenta na ora di maneha migracion sin stop di respeta e balornan humano y e obligacionnan internacional.

Vacature:

Asociado di Benta/ Verkoopmedewerker/ Sales Associate
(Part Time)

Bo por haya un bo producto di cabey adecua p’e cliente?
Y atende e clientenan cu un gran sonrisa?

Nos ta buscando un asociado di benta entusiasta
pa uni na nos ekipo di benta

Encunto L'ANZA Healing Hair Color & Care

Durante mas di 30 aña L'ANZA ta pionero den algun di e tecnologianan mas avansa y vanguardista cu e industria nunca por a mira. Desde e cuidu te cu colo, L'ANZA ta uza e tecnologia di ingrediente mas avansa, perfectamente balansa cu producto botanico silvestre y potente activo pa sana, seya y proteha e cabey. Nos a gana e reputacion di crea producto excepcional aclama pa su insuperabel rendimiento.

Un cabey sano ta e base di un estilo bunita. No ta importa e tipo of e textura, L'ANZA Healing Hair Care tin un receta pa alcanza hasta bo obhetivonan capilar mas ambicioso. Healing Hair Color ta ofrece un variedad completo di opcion di tiña permanente, semipermanente y demipermanente pa bo haya e tononan di moda di e temporada of simplemente bolbe retouch bo reisanan.

Pa nos clientenan, semper nos ta dispuesto pa ofrece nan e miho producto y conseho profesional.

Bon noticia:

Nos ta busca un asociado di benta pa nos tienda, specialisa den producto di cabey exclusivo.

Descripcion di e trabao ta lo siguiente:

- Lo bo ricibi e cliente cu profesionalismo y e calidez di nos tienda.
- Lo bo conseha nos clientenan den e compra di nos productonan capilar exclusivo.
- Lo bo yuda e cliente haya e producto capilar adecua cu adapta perfectamente na su cabey y lo conseha riba con pa uz’e.
- Lo bo ta amabel cu e cliente.

Profiel

Bo ta aplica awe pasobra...

- Bo tin un aspecto cuida y bon sentido di humor.
- Bo ta papia Hulandes, Ingles, Papiamentu y/of Spaño perfectamente.
- Como bendedo, bo ta proactivo, independiente y responsabel.
- Bo por adapta n’e deseo y e necesidannan di e cliente.
- Lo balora e experiencia den benta den e showroom.
- Scol: EPI
- Bo ta dispuesto pa traha durante fin di siman.
- Por ultimo, bo tin un gran capacidad administrativo y conocimiento informatico.

Telefon: (+297) 747-2433 • E-mail: elitelanza2023@gmail.com

Sorteo ta awe nochi

Awe abo tin chens di gana 1 miyon 900 mil florin cu Lotto 5



Diaranson ultimo Lotto 5 no a conoce ningun ganado cu ta pone e jackpot sigui crece y pa awe diasabra e suma bira 1 miyon 900 mil florin! Lotto 5 ta costa solamente 4 florin pa ticket y bo por combina bo 5 numbernan for di 01 te cu 35, si bo no sa cua numbernan pa kies, bo ta puntra bo rebendedo pa un loco y asina bo ta den wega pa bira e siguiente miyonario y gana e jackpot di 1 miyon 900 mil florin cu Lotto 5.

Corda busca bo Lotto 5 trempan, pa asina bo no keda afo di e sorteo miyonario di awe nochi cu Lotto. Tambe Lotto ta ofrece bo e opcion pa por cumpra bo weganan di Lotto Online, kiermen si bo no tin chens pa sali cumpra bo weganan preferi di Lotto, bo por cumpra for di bo smart phone, tablet

of bo computer!

Si ainda bo no tin un cuenta di Lotto Online, bishita www.lottoaruba.com, traha bo cuenta di hungado y asina cu bo wordo aproba, bo por cuminsa hunga Lotto online tambe!

Sorteo di Lotto 5 ta hunga awe diasabra pa 7.45PM y por cumpra bo ticket na bo rebendedo favorito te cu 7.30PM.

Lotto, E Loteria di Aruba tin diferente wega, Catochi, Big 4, 1-OFF, Zodiac, Wega di Number di Korsou di Lotto, Lucky 3, Multi-X, Lotto di Dia, Lotto 5, Mini Mega y cu su Mega Plus y e diferente weganan di Raspa y Gana y Instacash. Tambe lo por hunga Lotto Online door di bishita: www.lottoaruba.com pa por registra. Cumprando Lotto bo ta contribui na deporte riba nos isla. E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e comision di subsidio.

APPAREL

BOAT ACCESSORIES

[f TodomarAruba](https://www.facebook.com/TodomarAruba)
[@TodomarAruba](https://twitter.com/TodomarAruba)
[i TodomarAruba](https://www.instagram.com/TodomarAruba)
[+297 585 0555](tel:+2975850555)

FISHING TACKLE

FIBERGLASS PRODUCTS

Den cuadro di e bishita di Prinses Beatrix

Aruba ta yama bon bini na Prinses Beatrix



Diahuebs merdia, Prome Minister Evelyn Wever- Croes hunto cu Gobernador di Aruba, sr. Alfonso Boekhoudt, y sra. Hellen van der Wal di Dutch Caribbean Nature Alliance (DCNA), tabata presente na Aeropuerto Internacional Reina Beatrix, pa duna bon bini na Prinses Beatrix, cu riba invitacion di DCNA, lo ta na Aruba pa un bishita cortico. Durante su bishita, Prinses Beatrix lo asisti na un congreso na Universidad di Aruba, organisa pa DCNA, riba e tema di naturalesa.

Riba su propio iniciativa, Prinses Beatrix lo bishita Neptalie Henriquez Park, cu ta un speeltuín cu ta wordo remodela, hunto cu e fundacion Hulandes Jantje Beton. E fundacion aki, tin un iniciativa pa drecha varios speeltuín den e islanan Hulandes den Caribe, y pa e motibo aki, Prinses Beatrix lo bishita e speeltuín pa admira con bunita e ta kedando. Un otro proyecto cu Prinses Beatrix lo bishita durante su estadia cortico, ta telefon pa Hubentud, cu ta un proyecto cu e tin hopi cerca di su curason. Telefon pa Hubentud no solamente ta yuda aki na Aruba, pero tambe otro islanan den Caribe.

Finalmente, Diabierna mainta, Prinses Beatrix lo ta presente na Universidad di Aruba pa e congreso organisa pa DCNA, riba e tema di naturalesa. Prome Minister a indica, cu aunke e bishita di Prinses Beatrix, no ta uno oficial, nan a dun'e un caluroso bon bini. "Aruba semper tabata tin un lugá special den curason di Prinses Beatrix, y el a indica esaki bisando mi persona cu e ta contento di ta bek na Aruba, pa wak con e isla ta desaroyando despues di un par di aña cu e no a bin mas. Nos ta duna Prinses Beatrix un bon bini na Aruba, y spera cu su bishita cortico na nos dushi isla, ta uno fructifero" Prome Minister a expresa.



Bin bishita nos y probecha!
Paña di bon calidad na bon prijs.

Adres: Avenida Milio J. Croes 47 local 3
Telefon: 5646733 - 5653466
E-mail: info@carlymar.com

Minister Ursell Arends hunto cu Prinses Beatrix a wordo invita pa presencia e proyecto exitoso di reintroduccion di Lora na Aruba



Diabierna mainta Minister Arends tabata tin e honor pa acompaña Su Altesa Prinses Beatrix na e proyecto di Fundacion Parke Nacional Aruba y siña mas ariba e reintroduccion di lora na Aruba.

Lora ta un parha endemico, pero ya pa varios aña no por haya nan mas den nos naturalesa. E proyecto pa reintroduci loranan lo percura pa unabes mas nos por gosa di e parhanan aki den Aruba su naturalesa.

E proyecto ta un ehempel di colaboracion entre Aruba y Boneiro unda intercambio di conocimiento y esfuersonan entre esnan involvi pa logra un proyecto exitoso. Trahando hunto por amplifica nos logronan na beneficio di nos comunidad y nos herencia natural.

FPNA, como entidad encarga di e campaña di conscientisacion y educacion na e comunidad di Aruba ariba Lora, ta hunga un rol vital. Nan trabou ta sigura cu tur persona ta compronde e importancia di nan rol pa e proteccion di nos parha nativo. Cada ciudadano por contribui na mantencion di nos herencia natural, y tur e tesoronan cu nos naturalesa ta ofrece.

Pabien na e ekipo di Fundacion Parke Nacional Arikok pa nan esfuerso destaca y dedicacion pa haci e proyecto un realidad. Nan trabou ta representa un paso importante pa recupera nos patrimonio natural y ta demostra nan compromiso na nos flora y fauna. Pronto, ful Aruba lo por celebra e logro inmenso aki pa nos Pais!



Aruba su Barista Champion 2023 rumbo pa competencia final

P'e titulo maximo di Barista Championship na Costa Rica

Tin bastante trabou ora ta elabora un bebida na Starbucks y e baristanan di Starbucks sa esaki. Sea ta un espresso, un latte, cappuccino of un Flat White- tur bebida ta wordo traha cu pasion dor di baristanan cu tin orguyo pa demostra nan abilidadnan y di e forma ey eleva e experiencia di e cliente y calidad di e producto.

Aruba su representante; Mistika Cork cu a destaca den e mundo di koffie ta cla pa haci su debut den e industria di koffie internacional despues di a gana Starbucks Barista Championship 2023 aki na Aruba.

Mistika ta un barista cu experiencia di 12 aña na Starbucks Renaissance Mall. Pa Mistika coffee ta representa conexion cu su clientenan. E ta un satisfaccion inmenso ora cu un cliente yega su tienda y puntra specialmente pa e y pa e traha nan bebida preferi. Mistika su bebida di Starbucks preferi ta Chai Tea Latte, asina e mes ta conta.



Miles di barista rond di mundo a competi recientemente demostrando asina nan arte, innovacion den bebida y conocimiento di koffie. Como e ganadora di Aruba, Mistika como tambe ganadora di Curaçao, Rozalia Franciska lo competi contra barista nan di Latino America & Caribe na e competencia final di 'LAC Barista Championship' cu e speranza di gana e titulo di e miho barista di e region. E competencia lo tuma luga dia 13 pa 16 di November na Hacienda Alsacia, cual ta un finca di koffie na Costa Rica y sede global di agromonia, asina Sra Wanda Broeksema; district manager di Starbucks Aruba & Curacao ta declara.

Barista ta hunga un rol crucial den exito di Starbucks, y e LAC Barista Championship ta ofrece nan un plataforma pa muestra nan talento y pasion pa koffie, asina Tom Ferguson, presidente di Starbucks pa Latinoamerica y e Caribe a splica. "Atraves di e competencia, compartiendo historia cu otro por medio di koffie cu nan coleganan, nos baristanan ta reforsa e Mision di Starbucks: cu cada copi di koffie, cu cada conbersacion, cu cada evento den comunidad – nos ta crea conexion humano."

Nos ta desea ambos barista hopi exito durante e competencia final na Costa Rica.

DESTINY SECURITY

Ta busca security Pa Hotel

5
★

SOLICITA

**Mester domina
Ingles, Spaño
Papiamento**

Shift 7-3 / 3-11

Manda CV na
drh@destinyscrt.com

583 1212



Cu sosten grandi di publico general

Premio Crioyo di Oro lo wordo otorga na Robert Jeand'or

Dia 16 di october ultimo, durante e programa “Na drempel di fin di aña” di Erin Croes, Fundacion Go Cultura a anuncia cu e proximo baluarte cultural cu lo ricibi e premio nacional Crioyo di Oro lo ta Robert Jeand'or.


Premio Crioyo di Oro ta un reconocimiento cu a nace na 2021 como un “lifetime achievement award” pa reconoce, balora y celebra excelencia artistico y personanan den nos cuminda cu a dedica nan bida largo na desaroyo cultural di Aruba.

E reconocimiento aki ta wordo entrega durante un anochi di gala cu ta wordo combina cu un gran concierto como homenahe na esun cu ta ricibi e premio.

Nos por corda e homenahe dedica na Jossy Brokke den luna di december di aña 2021, caminda cu Fundacion Go Cultura a sorprende Jossy cu e premio aki y a nombra Jossy Brokke como Aruba su prome recipiente di Premio Crioyo di Oro. Despues di e exito grandi aki, Fundacion Go Cultura a dicidi cu lo continua cu e proyecto aki, considerando cuanto baluarte nos isla tin cu merece di wordo reconoci y homenahe di e forma aki, y tanten cu nan ta na bida.

Locual a bira diferente na 2022 ta, cu e aña ey a duna publico general e oportunidad via e plataforma digital pa nomina e persona cu nan ta desea pa ricibi e premio nacional aki.

Despues di mas cu mil nominacion, cual Fundacion Go Cultura a considera como un reaccion y cantidad fantastico, por a nota cu un cantidad abrumador a nomina Maybelline Arends-Croes como e proximo persona pa ricibi e premio aki. Maybelline a ricibi e premio nacional aki durante un homenahe musical fantastico den Cas di Cultura.



Pa aña 2023, un bes mas tabata tin e oportunidad pa publico general por nomina nan favorito. Cu 700 nominacion mas cu aña 2022, fundacion Go Cultura a keda hopi agradecido cu e iniciativa aki ta biba den nos comunidad.

E gran mayoria a nomina Robert Jeand'or como e ganado pa 2023 di e premio nacional aki. Robert Jeand'or ta wordo considera como un di e artistanan y baluartenan cultural di mas importante, emblematico y legendario di henter nos historia como isla y como pais.

Na su 69 aña di edad actualmente, nos por mira atras riba un carera y trayectoria impresionante di Robert como cantante, musico, arreglista, productor y ciudadano Arubano activo, ehemplar y productivo.

Loke nos por anticipa ta cu e homenahe di gala cu Robert lo ricibi dia prome di december proximo ta inclui un concierto musical carga pa un elenco impresionante di streanan briyante di e mundo musical di nos pais manera Rocco Franken, Noush, Jeffrey Kelly, Rachel Kraaijvanger, Jack Tromp, Julisa Arends, Danny Koolman, Jonathan Croes, Edjean Semeleer y hopi sorpresa mas.

E lo bira un biahe den Robert su carera musical desde su inicio te cu actualidad.

E artistanan cu lo ta parti di e anochi aki lo presenta Robert su exitonan musical y celebra hunto cu Robert, un bida excepcional di musica, inspiracion y alegria, cu sigur lo sirbi como inspiracion y herencia pa futuro generacionnan.

Fundacion Go Cultura ta gradici comunidad Arubano inmensamente pa a participa den e proceso di nominacion pa e proximo Crioyo di Oro.

Cu esaki Fundacion Go Cultura ta haya un bista mas cla, cua ta e personanan talentoso y creativo cu nos comunidad mes ta stima, respeta, aprecia, apoya y balora. Esaki ta duna nos fundacion mas animo pa sigui traha y purba reconoce personanan cu berdaderamente a duna di nan parti pa impacta, inspira, motiva, alegre, empodera y eleva e ser humano. Nan storia merece di wordo conta y nan aporte merece di wordo balora y reconoci di e miho forma posibel.

Gradicimento tambe na Gobierno di Aruba, UNOCA, Departamento di Cultura, SETAR, Aruba Airport Authority, Clickprint, Bodegas Papiamento, Artopia y Papiamento Restaurant pa nan sosten y aliansa sumamente valioso.

Pa carchi na balor di 50 Florin, por pasa na Fantastic Gardens na Bushiri. Pa reserva entrada pa e anochi magnifico di 1 di december, por comunica a traves di email: info@Gocultura.org of via Whatsapp: 5695442.

Keda pendiente pa mas detaye di “Premio nacional Crioyo di Oro, un Homenahe na Robert Jeand'or” den Renaissance Convention Center.

'The Greatest Show' un celebracion Total

The Chaz Modeling and Talent School a celebra nan di 25 aniversario

Dia Domingo 5 di November den Renaissance Convention Center The Chaz Modeling & Talent School a presenta un Fabuloso show den cuadro di nan di 25 Aniversario. Un Show cu a wordo organisa cu hopi amor y energia pa tur e añanan cu a desaroya talento aki na Aruba. Muchanan a haci super nan best y a presenta un tremendo show na unda tabata tin Baile, Canto y Fashion Show. Nos ta sumamente orguyoso di nos alumnonan.

Tabata tin cuatro desfile di Moda presentapadesign-ernan Neigy Alvarado di Republica Dominicana cu su coleccion "PINK" y Playero, Veronica Angrino di Colombia y nos orguyo di Aruba Gigliola Arends cu su coleccion "Celebration".

Nos invitadonan internacional tambe tabata tin presentacionnan espectacular, esta Explosion Dancers for di Curaçao. Cantante Jada van Dijk di Curaçao tambe a duna un super presentacion cu un tremendo repertorio di cancionnan. For di New York tabata presente un hoben artista Ester Lora cu a presenta Cancionnan di Broadway y sigur a pone e publico haya kippenvel.

Ester a join nos alumnonan tambe riba pasarela pa demostra su habilidadnan di modelahe. Na Final a premia e hobennan cu a gana miho diseñonan den e runway di Explosion of Colors/Prints/Trends, cu a bay pa e categoria Mini Samara Salazar, Pre-Teen Melaiska Woodley y Teen Jaydelynn Vriend. Modelonan Popular a bay pa Jarzhienne Roos (segundo luga) y Tanique Chan (prome luga).

E modeshow nan di Barbie y Zilver tambe tabata fabuloso. Un show super nice caminda cada Modelo a demostra un tremendo dominio di e pararella y nan habilidadnan den baile.

Danki na tur pero tur hende y instancianan cu a aporta na nos show aki cual ta The Greatest Show. Nos lo pone un lista di gradecimento riba social media y alabes poco poco nos lo post e imagennan di nos celebracion!!! Keda pendiente!!!

Pabien na The Chaz Modeling & Talent School y henter e Team cu a traha pa e show aki. Den un palabra ... TREMENDO!!! Pa otro aña keda pendiente pa proyectonan nobo y grandi pa nos muchanan y hobennan!!!



Minister Geoffrey Wever:

Minister Wever di bishita na Colegio Conrado Coronel



Diaranson 8 di november, scol basico Colegio Conrado Coronel na Morgenster a ricibi bishita di Minister Geoffrey Wever. E mandatario a tene un encuentro cu e muchanan di 6e klas. E obhetivo principal tabata pa discuti y consciencia e hobennan tocante e importancia di desaroyo sostenibel y con nan mes por contribui na un futuro mas sostenibel pa e proximo generacionnan.

Durante e bishita, Minister Wever a comparti su vision y pensamento tocante desaroyo sostenibel, enfocando riba areanan manera conservacion di medio ambiente, uzo responsabel di recursonan natural y promocion di tecnologia limpi. El a pone enfasis riba e papel crucial cu e muchanan mes por hiba den e lucha contra cambianan climatico y otro desafionan medioambiental.

E discusion tabata uno interactivo, unda cu e alumnonan a keda profundamente involvi. Nan a haci pregunta, comparti nan ideanan y expresa nan preocupacionnan tocante e futuro di nos isla y mundo. Minister Wever a elogia e entusiasmo y curiosidad di e hobennan. El a motiva nan pa sigui busca conocimiento y pa compromete nan mes den accionnan concreto pa yuda proteha y mehora nos planeta.

Minister Wever a apunta e importancia di educacion tambe den e proceso di fomenta un mentalidad mas consciente y responsabel riba tema di medio ambiente. El a subraya cu educacion ta e yabi principal pa capacita e proximo generacionnan pa enfrente e desafionan cu lo bin y pa nan por toma decisionnan informa y sostenibel.



Na final di e encuentro, tanto e alumnonan como e docente a expresa nan gratitud pa e oportunidad di por a interactua directamente cu Minister Wever y pa e conocimiento valioso cu nan a ricibi. Esaki sin duda ta un paso significativo den e direccion corecto.

E combersacion aki ta e comienso di un dialogo continuo, cu colaboracion entre gobierno y e comunidad educativo, pa logra un futuro mas sostenibel pa un y tur.

Luty Martines cu e Lifetime Achievement Award di CineAruba

Durante di e ceremonia di entrega di premio di Playa Film Festival 2023, Addonsito Croes a presenta y honra sra. Luty Martines, na nomber di Fundacion CineAruba, cu un bunita galardón dedica na su 40 añanan den e mundo di Teatro y Cine na Aruba. Ludmilla Henriette Martinez, miho conoci como Luty, a cuminsa 40 aña pasa den e mundo di e arte di teatro.

Durante 40 aña el a traha riba escenario- y pantayanan importante di e mundo di actuación na Aruba, Corsou, Boneiro, Saba y St. Maarten. Su prome rol, 40 aña pasa, tawata “Mrs Sullivan” den e obra di “Un trabao Milagroso” di Mascaruba.

Tanto Addonsito como Juan Pardo a felicita Luty deseando e tur éxito y salud di mundo. Cu hopi emoción Luty a ricibi y gradici CineAruba y tur presente pa e honor grandi aki ricibi. Su pensamiento ta y lo keda: “Cu of sin budget, produci toch”.



Jarissa Dubero cu tributo na Aruba



Como diseñado di trahenan di Aruba Tourist Carnival Group (ATCG), maestro di Arte na Colegio Arubano, Jarissa Dubero, a diseñá pensando riba varios atributo y elemento cu ta forma parti di Aruba su cultura y tradición. Den carnaval di Aruba esakinan lo ta bis-to den e paradanan cu nan grupo lo ta aden. E temanan ta Dera Gai, Pisca Gutu, Piscadonan di Noord, E Prikichi Caweta y Aruba su Placa. E banda ta Musical Time y algun di e artistanan riba caya ta Leo Rodriguez, Inky Richardson, Long Roy, Chicho Kock y Tattoo entre otro. Pa medio di e articulo aki, ATCG ta invita Aruba y cada turista pa join nos den Carnaval 2024! Por semper bishita FB of Insta di e grupo. www.arubatouristcarnivalgroup.com.

Parlamentario Guedez-Erasmus (MEP) ta aplaudi e proyecto di ADRA pa mamnan hoben

Diaranson ultimo Fundacion ADRA Aruba a duna clausura na e di 7 grupo di e proyecto pa mayornan hoben bou di e titulo 'From Teenage Parents to Life coaches'.

E edicion aki tawata un trayecto cu a dura 4 luna. E grupo meta ta mamnan hoben cu a sali na estado, cu no ta bay scol un otro oportunidad den bida. Durante e trayecto e mayornan hoben a ricibi hermentnan cu lo yuda nan regresa den nan bida estudiantil, den e mundo laboral of habri nan propio negoshi.

Durante e duracion di e proyecto, e mamnan hoben tawata ricibi lesnan practico cu tin di haber cu siña cushina, cosemento, obra di man, beyesa, manicure y pedicure. E lesnan teoretico tawata consisti di etiquette y protocol, relacion entre mama y yiu, administracion basico y salud en general. E lesnan aki a tuma luga mayoria biaha na Centro Hoben y Famia.

Durante cada les cada participante a ricibi conocimiento cu lo yuda nan den nan propio desaroyo, habilidadnan cu nan lo por pone den practica den nan bida diario.

Parlamentarionan di Fraccion di MEP, Darlaine Guedez-



Erasmus y Parlamentario Ricky Hoek tabata presente durante e ceremonia di certificacion, caminda e mayornan hoben mes a conta di nan experiencia positivo cu e proyecto aki y ta bisa cu mester sigui cu tipo di proyecto y pa duna mas oportunidad na nan. En total 5 participante a ricibi nan certificado den e diferente areanan impartí.

Parlamentario Guedez-Erasmus ta remarca cu ta importante cu hobennan cu ta interesa por registra cerca ADRA Aruba pa e inicio di e 8 grupo di mayornan hoben 'From Teenage Parents to Life Coaches'.

Tanto Parlamentario Guedez-Erasmus como Parlamentario Hoek a keda masha contento di por tabata presente durante e ceremonia bunita aki y mira con e grupo aki di mayornan hoben ta hayando un oportunidad nobo den nan bida.

Autor y periodista renombra Jancis Robinson a topa cu studiantenan di Universidad di Aruba

Invitado special, un celebridad renombra Jancis Robinson a bishita Aruba. Invita pa medio di Arion Wine Company den honor di su 20 aniversario. Jancis ta un autor, orador y autoridad renombra mundialmente pa loke ta biña, e ta skirbi un columna semanal pa Financial Times na London, y ta complementa esaki cu publicacionnan diario riba su website.

Durante su bishita riba e isla, Jancis a topa cu e tercer klas di Universidad pa un sesion interactivo riba tema di sostenibilidad. E encuentro a tuma luga na Arion Wine Company su luga principal na Ponton. Den su presentacion na studiantenan, Jancis a bay over na describi e mundo di biña y su carera manera autor, e invasionnan emocionante cu a sigui rond mundo, variante di biña nobo, hopi di nan indigena y previamente ignora, a descubri nan di nobo y trece nan bek na bida.

El a discuti e influencia di cambio di clima riba e plantacion di druif, y con paisnan ta beneficiando di clima mas calor, mientras otronan mester traha mas duro pa por sobresali e temperatura halto y cosecha prematuro di druif.



El a papia tambe riba vines bieu, biña natural, introduccion di twist caps, e uzo di cork bottle stoppers y boter di biña menos pisa. El a discuti e importancia di un tera saludabel como tambe metodonan biodinamico diseña pa brinda vines mas saludabel y productivo.

El a remarca tambe cu ta hopi esencial pa papia cu huespednan tocante nan gusto y expectacionnan, el a toca tambe riba tema di bleki di aluminium y pakete di carton, biña organico y necesidad pa reduci emision di carbon pa loke ta henter e industria.

E encuentro interactivo a conclui cu un Q&A, na unda a haya chens pa haci pregunta y tuma un oportunidad pa saca potret den grupo. E studiantenan tabata hopi encanta cu e conocimiento amplio di Jancis riba e complexidad di produci biña.

Addonsito Croes a entrega awards di Playa Film Festival 2023

Den Kenwolf Studio na Oranjestad, cu musica di Adriano Nanof, a tuma luga e entrega di premio na e ganadonan di Playa Film Festival 2023. Cinco (5) scol secundario a participa p'e premio di Best Student Short Documentary cu tawata Colegio San Antonio, St. Augustinus College, YNZ Montessori, Mon Plaisir HAVO/VWO y De Schakel College.

Tawata Mon Plaisir HAVO/VWO a resulta e scol cu e pelicula cortometraje ganado.

E miho Feature film 2023 tawata "It is not past 08-12-1982" di Ida Does di Hulanda. E miho Short movie 2023 tawata "Stick is Life" di Miguel Galofre di Trinidad & Tobago. E MC tawata Addonsito Croes.

E anochi aki, Addonsito Croes y Juan Fransisco Pardo di fundacion CineAruba como sorpresa a haci entrega tambe di dos (2) galardón como actuacion sublime y como talento nobo den e mundo di pelicula na Tuesday Irwin y Nathan Matthew Legger for di Londen. Pa 2024, Playa Film Festival lo t'ey atrobe.



Violet Spa

Servicios a Domicilio

- Masajes Anti-Estress y Relajantes
- Masajes Terapéuticos
- Reflexología Podal
- Detox Lónico

Masaje Reductor

Masajes reductores contiene:

- Aparatología Combinada
- Manta Térmica
- Maderoterapia
- Drenaje Linfático

Moldeo de Figura

con cierre de costilla y reloj de arena



+297-740-5235



Ubicación bajo demanda



BEAUTY & SPA

Parlamentario Shailiny Tromp-Lee (MEP):

Gobierno su intencion: Entrante augustus 2024 cuminsa cu alfabetisacion na Papiamento den klas 1

Recientemente, como Presidente di Comision Fiho di Enseñansa di Parlamento, mi a invita Minister di Enseñansa y Deporte sr. Endy Croes pa bin duna un update riba e implementacion di e maneho di idioma cu Gobierno a presenta na Parlamento. Hunto cu Departamento di Enseñansa Minister a brinda informacion concreto encuanto e proceso pa introduci alfabetisacion na Papiamento den tur klas 1 na Aruba entrante augustus 2024. Esaki ta nifica cu nos muchanan ta bay siña lesa y skirbi na Papiamento.

Hulandes ta bay den un otro bachi y lo keda trata como un lenga stranhero. Sigur mi ta aplaudi e decision aki cu sigur lo beneficia nos muchanan. Alabes mi ta contento di mira cu a percura cu e maneho ta dirigi riba desaroyo di e abilidadnan di tur 4 idioma cu nos ta custumbra cu nan aki na Aruba. Otro aspecto interesante ta e echo cu a percura pa e plan ta tene cuenta cu nos mercado laboral, doorstroming den e siguiente nivel di enseñansa y e competencia basico cu cada ciudadano di nos pais mester tin.

Minister Croes y Departamento di Enseñansa a informa Parlamento cu e leyman existente ya ta brinda e oportunidad pa introduci dicho alfabetisacion. Cu otro palabra no ta rekeri cambio di ley of un ley nobo. Alabes a keda enfatisa cu mirando e proceso cu a keda encamina pa yega na e Maneho Integral di Idioma caminda e veld di enseñansa (Plataforma) tabata involucra desde un principio den e concretisacion di esaki, ta existi draagvlak pa cu implementacion di dicho plan.

A informa Parlamento cu den october a reuni cu Inspectie, directivanan di scol



y demas stakeholders pa sigui traha riba e planificacion pa haci e introduccion aki entrante augustus 2024 posibel. A keda indica cu Departamento di Enseñansa lo sostiene directivanan di scol y cabesantenan di scol den e planificacion di e implementacion.

Desde e luna aki lo inicia cu e Trayecto di Preparacion y Profesionalisacion di nos maestronan pa nan ta cla pa ehecucion di e plan entrante augustus 2024. Ta trata di 6 workshops cu lo trata entre

otro contenido, pedagogia y didactica den idioma Papiamento y Hulandes.

Sigur ta na su luga pa gradici y desea tur clase di exito na e team encarga cu e implementacion di e maneho aki y cu ta trahando masha duro mes pa su concretisacion. Siguierte reunion cu Minister den Comision Fiho di Enseñansa nos lo trata e diferente leyman cu minister ta trahando riba nan. Cu otro palabra dentro di poco un biaha mas Minister lo ta na Parlamento.

Cuentos y fábulas

Pedro Vargas Álvarez ta bishita Aruba actualmente pa participa na e Festival di Buki pa Mucha 2023. E ta Poeta y escritor y a nace na Santafé de Bogotá. Durante su careta e tabata entre otro alcalde di Guataquí. Pedro Vargas Álvarez a publica diferente buki pa mucha tambe y den e siman aki e ta bishita scol pa conta storia. Algun publicacion di sr. Pedro nan ta: 'Poesía para Todos' (2 tomos), La pluma de los sueños, 'Un Alcalde en apuros', 'S.O.S.Travesuras en mi escuela', 'Cuentos y fábulas'. Sr. Pedro a regala biblioteca 3 ehemplar di 'Cuentos y fábulas'. E biha aki un edicion na Spaño y Papiamentu. Pa medio di su storianan e ta presenta guia di comportacion pa mucha pa logra crea un comunidad sano.



PASEO HERENCIA

*THE BEST ENTERTAINMENT
IN THE BEST ENVIRONMENT*

- **LATEST RELEASES**
- **RECLINING SEATING**
- **LASER PROJECTION**
- **7.1 DOLBY SOUND**
- **RESERVED SEATING**
- **ONLINE TICKETING**
- **CONCESSION AND DELI**

Parlamentario Tevreden ta felicita Fundacion Hende Homber

Exitoso conferencia ‘Hombernan cu ta marca e diferencia’

Durante e fin di siman cu a pasa, Fundacion Hende Homber a organisa un tremendo conferencia ‘Hombernan cu ta marca e diferencia 2023’ cu diferente orador invita cu a elabora riba e tema: bienestar emocional y mental, cada un for di nan punto di bista y nan experticio.

Parlamentario y Lider di Fraccion di MEP, Hendrik Tevreden tabata presente durante e conferencia aki. Den su concepto esaki sigur tabata un conferencia hopi bon cu diferente topico cu hende homber tin mester y cu e profesionalnan a sa di trece padilanti den tremendo forma, specialmente psicologo forensico Sr. Johnny Boekhoudt, cu a fungi como orador principal. Sr. Boekhoudt a trece dilanti cu hende hombernan no ta papia, y hopi bes no ta busca ayudo pa problemanan cu nan ta sinti of traumanan cu nan tin di infancia.

“Boekhoudt a splica e concepto di miedo den un manera ful diferente cu mi no a scucha prome. Enfocando cu miedo por ta algo bon tambe. Pasobra miedo, por ehempel, ta yuda bo reacciona riba peligro. Of reacciona riba un menasa. Pero miedo cu no ta wordo atendi, pero suprimi por rementa tambe si e persona cu ta sinti esaki no siña con pa e deal cu su miedo y canalisa esaki di un forma saludabel”, Parlamentario Tevreden a expresa.

El a sigui bisa cu como hende homber tambe tin di siña canalisa tristesa y preocupacionnan. “Nos tin di siña papia di nos dilemanan intimo cu un persona cu nos ta confia. Y nos sa cu no lo bay divulga esakinan cu otro



hende”, a bisa. Por ehempel, a agrega, hende homber por tin momentonan pa por yora tambe. Pa asina por saca di un forma normal y natural tur e presion grandi cu ta biba riba su schouder.

Esakinanyhopimas punto Sr. Boekhoudt a papia riba dje, y tur hende homber como tambe publico presente, por a siña durante e dia aki. “Mi kier motiva y recomenda nos hende hombernan cu si nan haya e oportunidad di scucha Sr. Boekhoudt su presentacionnan pa haci esaki”, lider di Fraccion di MEP a

expresa.

Finalmente, Tevreden a felicita Fundacion Hende Homber pa e evento exitoso aki, cu a wordo organisa den cuadro di nan di 10 aniversario y cu ademas tabata gratis pa publico. “Hende homber tin derecho pa busca ayudo y sigur tin di eherce e derecho aki, pasobra ayudo profesional lo por yuda nos sali di of siña deal cu nos pasado of tambe cu presente”, asina Parlamentario Hendrik Tevreden a finalisa bisando.

Pasta Vruocoli Arriminati

Puedes aprender a hacer este auténtico plato italiano paso a paso con esta receta.
Esta Pasta Vruocoli Arriminati te transportará a Italia con su sabor único.

Receta

TIEMPO PREVIO: 15 minutos

HORA DE COCINAR: 45 minutos

TIEMPO TOTAL: 1 hora

2 SERVICIO

Ingredientes:

Para la coliflor

- 1 coliflor grande
- 2 cuartos de agua hirviendo
- 2 rodajas de hojas de laurel
- 1 cucharada Sal molida

Remojar las pasas

- 1/2 taza de agua tibia
- 2 onzas Pasas

Remojar el azafrán

- 1 cucharadita Agua tibia
- 1 cucharada Azafrán

cocinar la cebolla

- 1 cucharada Aceite de oliva virgen extra
- 1 cebolla grande, picada
- 1/4 cucharadita Sal molida
- 3 sardinas medianas saladas
- 1 taza de agua hirviendo
- 1 1/2 onzas Piñones tostados

[Para coliflor]

- 1/2 cucharadita Sal molida
- 1/2 taza de agua hirviendo

Para las pastas

- 350 g Bucatini
- 1/2 cucharadita Pimienta negro
- 1 cucharada Aceite de oliva virgen extra

Muddica Atturrata

- 2 cucharadas Aceite de oliva virgen extra
- 1/2 taza de pan rallado
- 1/4 cucharadita Sal molida
- 1/4 cucharadita Pimienta negro

Direcciones:

1 - Lavar y luego cortar la coliflor en trozos pequeños.

2 - Remojar las pasas y el azafrán para que se ablanden en agua tibia durante 20 minutos.



3 - Añade las pasas escurridas y el azafrán y cocina unos minutos.

4 - Hervir la coliflor durante 20 minutos en agua con sal con hojas de laurel y reservar el agua de cocción que utilizarás estrictamente para cocinar la pasta bucatini.



5 - Sofreír la cebolla picada en una sartén. En cuanto la cebolla esté dorada.

6 - Agrega sal y sardinas saladas, triturándolas con una cuchara para reducirlas a pulpa.

7 - Añade los piñones tostados, las pasas remojadas y la mitad del azafrán remojado y cocina unos minutos.

8 - En este punto añade la coliflor hervida y espolvoréala con sal. Mezcla bien, frecuente y constantemente con una cuchara de madera hasta lograr la consistencia cremosa que desees. Agrega unas cucharadas de agua y cocina por unos 10 minutos.



9 - Cubrir con la tapa y reservar.

10 - En este punto, cocine 350 g de bucatini en el agua de coliflor y déjelo reposar durante 6-7 minutos.



11 - Prepara la "Muddica Atturrata" que se obtiene poniendo en una sartén una cucharada de aceite con pan rallado, que tostarás sin dejar que se queme, cuando esté bien coloreado retira del fuego.

12 - Escurre la pasta y agrégala a la cacerola, agrega el resto del azafrán, la pimienta y el aceite de oliva, revuelve bien.

13 - Después de servir se añade un poco de "Muddica Atturrata" y se espolvorea sobre la pasta (el queso de los pobres, dice la tradición).



14 - Disfrutar.

Fortaleza pa Famia

Nos ta embahador den Cristo Hesus, pa reconcilia hende cu Cristo Hesus

DEN Mateo 13:26 -30-41 ta para skirbi: Y ora cu e trigo a spruit y a forma tapushi, e yerba shimaron tambe a keda bisto. Esey ta pa nos tur ta na altura cu e trigo y e yerba shimaron ta crece hunto.

Ken ta e trigo? Esey ta e bon simia cu Hesus a sembra. Y ken ta e yerba shimaron? Esey ta e mal simia cu e diabel a sembra (Mateo 13:38-39).
Con bo ta reconoce e diferencia entre trigo y yerba shimaron?

Bo ta conoce na su fruta: E trigo ta duna fruta di obediencia y humildad.
Pero e yerba shimaron ta duna fruta di orguyo, rebeldia y inmoralidad.

E esclavo a bisa e doño di cunucu cual ta Cristo Hesus, Bo kier pa nos bay y recoge e yerba shimaron for di e maishi?
Hesus a contesta: No pa no sosode cu mientras boso ta recohe e yerba shimaron, boso ranca e trigo tambe hunto cu ne.
Laga tur dos crece hunto te na cosecha. Y e Yiu di hende lo manda Su angelnan y nan lo recohe for di Su reino, tur piedra di tropica y esnan cu ta haci inikidad, y lo tira nan den forno di candela.

Ningun hende por separa e trigo for di e yerba shimaron, Señor mes lo manda su angelnan pa haci'e.

Si nos no tin pasenshi y kier haci algo cu Dios no a manda nos, nos lo causa problema grandi.

P'esey den 2 Corintionan 5:18 ta para skirbi lo siguiente:
Awor tur e cosnan aki ta bini for di Dios, Kende a reconcilia nos cu Su mes door di Cristo y a duna nos e ministerio di reconciliacion.
Esta cu Dios den Cristo tabata reconciliando e mundo cu Su mes sin tuma nan picanan na cuenta, y E a encarga nos cu e palabra di reconciliacion.
P'esey nos ta embahadornan pa Cristo, como si fuera Dios tabata spierta door di nos, nos ta roga boso den nomber di Cristo, sea reconcilia cu Dios.

Un embahador den Cristo ta pone su mes interes un banda pa e sirbi Cristo, y no ta traha segun programa di hende, pero segun palabra di Dios.

No lubida locual ta para skirbi: No laga ningun hende gaña



boso, Mal compania ta dañá bon custumber (1 Corintionan 15:31).

Un embahador den Cristo mester tin contacto constantemente cu e trono di Dios (Daniel capitulo 6).

Un embahador den Cristo mester ta firme y fiel (Efesionan 6:20).

Un embahador den Cristo no ta sirbi ningun clase di interes politico, ni tampoco ta compromete su mes cu hende, tampoco tin faboritismo (Galationan 1:10).

E yamada di un embahador den Cristo ta sagrado, puro, sin envidia, y liber di tur clase di corrupcion.

E encargo di reconcilia hende cu Dios, ta mas grandi di locual hende por kere, pasobra nos ta yama pa reconcilia esnan cu ta den scuridad cu Dios, pa ranca nan saca for di gara di diabel, pasobra e embahador ta funciona segun e Palabra di Dios ta indica nos den Mateo 11:28).

E tempo di cosecha ta cerca y Cristo Hesus ta cla para pa manda su angelnan pa recohe e cosecha, y asina e separacion lo tuma luga, e bon simia pa bida eterno y e yerba shimaron pa morto eterno.

No lubida: Un mensahero malvado ta cay den adversidad, ma un embahador fiel ta trece curamento (Proverbionan 13:17).

Nos ta embahador den Cristo Hesus, pa gana alma pa Dios, y trece nan na e berdad cu ta haci nan liber.

Sinceramente, Pastor Marcel Balootje

Parlamentario Shailiny Tromp-Lee (MEP):
**Mi ta gradici y felicita Fundacion
 Hende Homber Aruba cu ta traha riba
 empoderacion di nos hendenan homber**



Diasabra ultimo, 4 di november, Fundacion Hende Homber Aruba a celebra nan di 10 aña di existencia cu un tremendo conferencia.

Na prome luga mi ta gradici Fundacion Hende Homber Aruba pa e invitacion pa mi participa nan dicho conferencia y tambe kier a felicita nan cu nan 10 aña di existencia y pa tur nan trabounan realisa pa empodera e hende homber.

E conferencia no tabata dirigi solamente na e hende homber pero sigur como hende muhe mi a keda encanta cu e diferente topico y angulo cu esakinan a keda adresa. E conferencia su titulo tabata: “Hombernan cu ta marca e diferencia”, na unda e enfoke tabata riba e “bienestar emocional y mental”. Tabatin diferente orador local y e topiconan tabata varia. Mi por bisa cu e tabata un tremendo conferencia. Mi lo conseha tur ser masculino pa otro aña no perde e oportunidad di participa. E lo enrikece bo grandemente y sigur lo haci un impacto riba bo actitud y actuacion. Banda di e hecho cu e por aporta grandemente na bo crecemento y desaroyo propio.

Sigur mi ta aplaudi e meta di e fundacion pa empodera nos hendenan homber pa nan mes por ta of bira un miho persona y ta feliz. Na mes momento e plataforma ta brinda nan e tools pa nan ta entre otro un miho yiu, casa/pareha y tata.

Ami a keda encanta! Un pabien sigur ta na su luga na full e comite organizado y tur otro stakeholder cu a haci e conferencia di Fundacion Hende Homber Aruba posibel. Mi kier a termina deseando Fundacion Hende Homber Aruba hopi exito cu tur nan proyectonan den tapara.



“Señor ta mi wardador, mi’n tin falta di nada.
 Den Cunucu di yerba berde e ta ponemi sosega.
 E ta hibami na awa frankil, pami bolbe haña
 forsa”. - Salmo 23

Cu inmenso tristeza na nos curason,
 nos ta anuncia fayecimento di nos ser stima
 Casa, Mama, Wela, Ruman y Tanta

Rufina Erasmus-Thiel

Miher conoci como:

“Ina” of “Rufi”

*23 november 1937 - †6 november 2023

Na number di su:

Esposo:

Pablo “Buchi” Erasmus

Yuinan:

Arsenio Erasmus

Felix & Milangela Erasmus-Vlaun

Nietonan:

Jerrick & Jerrel Erasmus

Manera Nieta:

Shully Felicia

Rumannan:

†Carmen Falconi-Thiel y famia

Francisco “Chico” Thiel y famia

†Bernadino “Didi” Thiel y famia

†Juanita “Chichi” Werleman-Thiel y famia

†Lucianita “Nini” Arends-Thiel y famia

†Theofilo “Theofi” Thiel y famia

Josefa “Chefa” Erasmus-Thiel y famia

Rogelio “Rodger” Thiel y famia

†Fabian Thiel y famia

†Dominico “Shonco” Thiel y famia

Ayudantenan:

Judith Felicia

Rumannan Testigonan di Jehova di

Congregacion Papilon

Pablo & Erna Schönherr

Swa y cuñanan, primo y primanan, ihanan,
 bisiñanan,
 Amigonan y Amistadesnan

Demas Famia: Erasmus, Thiel, Vlaun, Pietersz,
 Falconi, Werleman, Arends, Tromp, Diaz,
 Hernandez, Ruiz, Kock, Limonier, Giel, Dirks, Hill

Nos disculpa si den nos tristeza nos por a lubida
 un of otro famia.

Oportunidad pa condolencia lo ta **diasabra
 11 november 2023** di 9 pa 11 am na Salon
 Macuarima y despues di esaki acto di despedida
 lo tuma lugar den seno familiar.

Ta lamenta cu despues di despedida
 nos no lo ricibi bishita di condolencia na cas.



*come to me,
 all you who
 are weary
 and burdened,
 and I will
 give you rest.*

MATTHEW 11:28



Mamá te fuiste y una parte nuestra se marchó contigo, quédate en nuestro recuerdos, donde nadie te toque... Porque jamás se va lo que queda dentro de El alma. Nos diste todo sin esperar nada a cambio, nos enseñaste el significado del amor incondicional, recordar tu risa siempre nos hará sonreír. Tus consejos nos guiarán siempre.

Es un honor y un privilegio ser tu Familia, Te amaremos eternamente. Con dolor en nuestros corazones, anunciamos el fallecimiento de:

Sra. Yaneth de Jesus Lopez de Gutierrez

Nombre de cariño "Marellys"
*14-11-1960 - †03-11-2023

Padre: Alfonso López Puerta

Madre: †Eugenia Junco Parra

Esposo: Miguel Gutiérrez Pedroza

Hijos:
John Jairo Gutiérrez López
Yacquelin I. Gutiérrez López
Mairon F. Gutiérrez López
Miguel A. Gutiérrez López
Amanda Gutiérrez López

Nietas: Jaleinis K. Gutierrez Llerena
Milieny G. Gutierrez Lopez
Saray L. Gutierrez Calle
Salome Y. Gutierrez Lopez

Hermanos:
Armando Lopez y Familia
Adolfredo Lopez y Familia
Luz Marina Lopez y Familia
Josegil Lopez y Familia
Olivia Lopez y Familia
Rosiris Solano y Familia
Saturnino Solano y Familia
Dervis Solano y Familia
Oscar Solano y Familia
Rosana Solano y Familia
Doniris Solano y Familia
Ingrid Solano y Familia
Nelcy Solano y Familia
†Erinerdo Lopez y Familia
†Enrique Lopez y Familia
†Aristidis Solano y Familia

Demás familiares en Colombia y amigos.

El acto de entierro será el **Sabado 11 de noviembre del 2023** en Aurora Funeral Home de 1 pm a las 4 pm, después saliendo para el cementero en Sabana Basora



Queridonan, laga nos stima otro, pasobra amor ta bini di Dios. Tur cu ta stima a nase di Dios y conose Dios. Esun cu no ta stima, no conose Dios, pasobra Dios ta amor. - 1Huan 4: 7-8

Cu inmenso tristesa na nos curason, pero conforme cu boluntad di Dios, nos ta anuncia cu a bay sosega den brasa di Señor

Adriana Maria Koolman

Mihor conoci como:
"Diana", "Chama", "Tanana"
*08-09-1939 - †28-10-2023

Acto di entierro lo wordo anuncia despues.



Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur buniteza.

Cu inmenso dolor na nos curason pero conforme cu boluntad di Dios nos ta participa fayecimento di:

Bernardo Toppenberg

Mihor conosi como Nino
*27 Juni 1943 - †07 Nov 2023

Number di su yiunan:
Donald Toppenberg
Egbert Toppenberg y Sra Astrid Toppenberg-Sapuana

Nieto i nietanan:
Gislaine Lampe
Joshua Toppenberg
D'Ocean Toppenberg
Donalsito

Su Compañera di vida: Sra Carmen

Mayornan:
†Bernardo Toppenberg y †Sra Victoria Toppenberg-Habibe

Mama di su yiunan: Gertruda Corneilio

Rumannan:
Donald Toppenberg y famia
Richard Toppenberg
†Hubert Toppenberg y Elaine Hoek famia
Reina Diaz-Toppenberg y Esposo David Diaz y famia
Gladys Cellaire-Toppenberg y Esposo Eric Cellaire y famia
Ruben Toppenberg y Sra Ursula Toppenberg-Habibe y famia
Sandro Toppenberg y Sra Yenny Toppenberg-Altagracia y famia
Lisette Ruiz-Toppenberg y Esposo Jose Ruiz y famia
Julisa Toppenberg y famia

Subrina y subrino nan:
†Eefje, Shahaira, Hendrik, Cherly, Laimbert, Alexander, Janine, Yuraney, Yerremy, Rubiella, Ruthsella, Lisa, Kimberly, Beverly, Yerely, Yeraimy, Reelison, Jayrone, Marshall, Asher

Primo y Prima nan,Amigonan y conocirnan

Demas Famia: Toppenberg, Habibe, Diaz, Cellaire, Corneilio, Sapuana, Lampe, Altagracia, Spencer, Lake, Ruiz, Cortes, Tevreden, Rumnit, De Lanoy, Tromp, Weltevreden, Cardoze, Zeidan, Escalona
Un danki na e staff completo di e Tehuis Betesda

Acto di Entierro lo tuma lugar **diasabra 11 November 2023** pa 2or pa 4or di atardi na misa Fatima Dakota, despues ta sali pa Santana na Sabana Basora

Despensanos si por a lubida algun familiar den nos trista cu perdida di Bernardo




Tur cos aki na mundo tin su ora y su tempo,
Ora pa nace y ora pa muri, ora pa yora y ora pa hari,
Ora pa keda keto y ora pa papia, ora pa stima y ora pa odia,
Ora pa guerra y ora pa paz"
Predicador 3:1-2-4-7-8

Cu dolor na nos curason, nos ta participa fayecimento di nos ser stima:

Sra. Leenchi Sam

*02-11-1957 - †01-11-2023

Acto di despedida lo wordo anuncia despues



Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur buniteza.
Autor: Cado Wever.

Cu dolor na nos curason, nos ta participa fayecimento di nos ser stima:

Astrid Jolanda Tromp

Cariñosamente yama "Ija"
*07-04-1965 - †10-11-2023

Acto di despedida lo wordo anuncia despues



Gradicimento / Invitacion

Na number di famia nan nos kier a gradici cada un cu a tuma nan tempo pa a bin dispidi di nos ser stima:

sra. Senobia Maria de Cuba - van der Linden

Cariñosamente yama "Chichia of Mama Chia"
* 01-07-1933 †28-10-2023

Boso muestra di atencion ta di hopi aprecio y un gran sosten pa nos. Un danki na un y tur cu a manda carchi, krans, whatsapp, email y a hasi yamada nan telefonico.

Danki tambe na Wit-Gele Kruis, sevicio di Ambulance y dr. Texier.
Y alaves nos kier a invita pa 3 Sacrificio di Parokia di Savaneta .. diabierna día 10 di November y 13 November y 17 November orario 7:00 pm.

Bo(so) presencia lo ta altamente aprecia.



Lagrima y floran por seca, su recuerdonan y tur loke el a haci y significa pa nos, lo keda graba pa semper den nos mente y curason.
"Cerca Dios mi alma ta na paz, ta di DJ'E mi salvacion ta bin"
Salmo 62:1

Cu dolor na nos curason, nos ta participa fayecimento di nos ser stima:

Yolanda Elizabeth Adelaida Boekhout

Cariñosamente yama "Yoly"
*12-11-1960 - †09-11-2023

Acto di entierro lo wordo anuncia despues



AWEMainta

Scan nos QR code y bira abonado di AWEMainta

Completamente GRATIS

1: Usando bo camera di telefon,
scan nos QR code na banda.

2. Bay riba "Show Options",
"Open in browser".

3. Yena e formulario.

**Haya AWEMainta
tur dia den bo inbox!**



www.awemainta.com



www.facebook.com/AWEMainta



5880022



info@awemainta.com
noticia@awemainta.com
aviso@awemainta.com